

PORI MA EFESASÍ NANIN BANTA UVAMAN AMEIN BOMPON MINO (Efesasi)

Efesasi Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-tu (62) fin mi Korosí nanin bantai vompon má Firimonini vompon má manafin kauran baren orein mino.

Ma vompon ma uvantein baru ino.

Romú kákan barurá karavusií uran báken karavusi namun pintéi uvanten mino.

Ma vompon ma uvaman amikhein kéká ino.

Efesasí ma monó nanin banta varé eimpin mifo mai vompon mano anan Esiá barafin ma varé ein monó namun kayofimpá deren eúkukhen mino.

Nái ana vará ma vompon uvanten nafino.

Ena anan nanin banta finté ma monó tiyain nana ma Esiá barafin bain Yutan kayo ano ma oyan amen nan mino. Yutan kayo vá ena anan kéká bápín ma ákona kafi varé ein ma Tiýarafenu ano Karaisin tiantan ma yoruman barákuren ma míkampin mana mumunan kaen ma inká Karaisimpin ma mamán mana kékasién ma ukhein nan mi ma ma minópá uvaman amikhein bompompín tian amá ukhen mino. Ma vomponi kankan saptafin mi monó tin avúavá pákena ineine amen mi inká Tiýarafenui aruvin dana san tikhan ma minó ano anunu iyain vesi va san tian amá ukhen mino. (Sapta 6:10-18 fin ná onano.)

Porini Susu Vaya Ino

1 ¹^aYisas Karaisini kama vaya varen orin bantaí ino van ma Tiyaarafenu ano vei anunurá ma aní ukhein banta séi Pori anon ma vompon uvaré uno. Efesasí ma Tiyaarafenui kantá nanin banta váken Yisas Karaisintá ma mumunan ukheona kayon uvaman amé uno.

²Teti Sifóe Tiyaarafenu vá inká tetisi Bafan Yisas Karaisin má anon tiretin tarisari uren ará kusin aminten mino.

Yisas Karaisin Táké Ma Kantasí Ukhein Avu Varan Baya Ino

³^bTetisi Bafan Yisas Karaisin Afóen Tiyaarafenu avisá daní ó tifano. Béi anoi setin tivábá uren mi inaru fákena kama yanasinta setin timikhan mai anoi setin tú iyampon tiya iyan mino. ⁴^cMai fara vara seyo, Tiyaarafenu ano ma vara ída uvanten pefái setin aní uren Yisasín má maman túpá ukharen mino. Para va ino. Béi setin nan anunu uren mi mai avúavá mádan baren ben avorá kantasí ukhein nanin banta ano setin nan ída aau manten mino sinten mino. ⁵^dTiyaarafenu ano Yisasín pinté uaren tetí ankan e sivían be akhasí ono van inikhen mi véin kákan amusin uanten mino. ⁶Tiyaarafenu ano ma setin tarisari urá ma ve Anin má túpá ukhé tiferuna vará ben aví daní ó tifano. ⁷^eTiyaarafenu ano Yisas Karaisin pinté uaren mi setin moéken tarisari uren beni narefó ume finté setin evaránen tivíken mino. ⁸Tiyaarafenu ano vei kama ineine vá tarisari vá tetimpin banaen mino. ⁹^fPefá ma Tiyaarafenu ano ma Yisas Karaisintái ma yaná baranté uno siren ma inian kain ma aúpá bá ein mai saréan bariyáken mi setimpin tian amá iyan mino. ¹⁰^gMai veni ineine máan mi ukhen mino. Be ma aní ukhein damú ma afoká intin maen minó ma vara ráke yanasinta vá inaruráke yanasinta vá o éke e éke uan manafin átaru urantin maen Yisas Karaisini yafisin aránaópá anan banten mino.

¹¹^hYisas Karaisin má ma súpá ukhé tiferuna van mi Tiyaarafenu ano setin nan bei vanasi ino sen aní ukhen mino. Máan tukhantíi Tiyaarafenu ano ma fefá iyátintákaré ein danasinta vará tifanté uno. ¹²Tiyaarafenu ano ma máan tein mai seti Yutan nanin banta ano ma Yisas Karaisimpin naren ma ákona inin ma ave ukhé tiferuna kéká ano Tiyaarafenu aví daní iyan kákan bí amino van mino. ¹³Tireti ena anan nanin banta ano Yisasini fura vaya vá kama vaya vá inire mumunan e ono. Máan ma eona anon tiretin aya uran mi Tiyaarafenu ano seti Yutan kayo ma einíen tiretin avían Yisasín má túpá en mino. Máan turen mi vei vanasi ma ameno van iyáantan baré ein Kantá Aunan ma siretin amein manon beni vanasi ino sen aní ukhen mino. ¹⁴ⁱTetí ankan ma Tiyaarafenu ano iyátintan bain

^a 1:1 Apo 18:19-21; 19:1 ^b 1:3 Efe 2:6 ^c 1:4 Yon 15:16 ^d 1:5 Yon 1:12 ^e 1:7 Efe 2:7; Kor 1:14 ^f 1:9 Rom 16:25 ^g 1:10 Kor 1:16, 20 ^h 1:11 Rom 8:28-29 ⁱ 1:14 2Ko 1:22

danasinta ma ínaimpá baranunai fura sen Kantá Aunampó tetimpin aní ukhen mino. Mai vará tetí ankan kakhakein Tiya rafenu aví daní ó tifano.

Efesasi Nanin Banta Ayaino Van Ma Pori Amúkein Baya Ino

¹⁵Bafan Yisasintá ma ákona e mumunan iyáke monó nanin banta ma minó pimpá ma vain ma avábá iyaona vaya vá iné uno. ¹⁶Mai van mi séi Tiya rafenu vaípa ena ena susu siantiyáké ákona é timúkuantiyá uno. ¹⁷^jMáan tiyá inká tetisi Bafan Yisas Karaisin Afóe ma moéken kakhakhein Tiya rafenu vaípa tiretíi mumunampin kama afova amintin Tiya rafenurá ma mumunan in avúavá kama e afová ono van timúkuantiyá uno. ¹⁸Máan tiyá inká tiretíi inin ona yiantantiya kama yanasinta ma ameno van dan bain afová ureya mai yanasinta varanté uno sire mairá ákona kaono van mai van deren timúkiyá uno. Mai fara vara seyo, kokhon danasinta ma vei vanasi iyáantan baréin ma amikhein afová ono van muno. ¹⁹⁻²⁰^k ^lMáan tukháí mai ma minó daná esantaren dan uron bain ákona vaintá ma mumunan iyá tiferuna kéká ano afová ó tifano van mi simúkiyá uno. Mai ákona maen mai ma Yisas Karaisi ma furin pintena evaránen avían mantaren kákan bí amiren ma ve ayan kuompá ma yan inarufá bain má manafí ukhein ákona ino. ²¹^mMáan tukhein nan mi Yisas Karaisi anon namu aunan kayo ma moékan ákona vain kayorá dafíken mino. Máan tukhan mi ven aví bá ákona vá anon ánon banta kayo aví bá ákona vá esantakhen mino. Máan tukhein béi ída saréa ana yafisinten mifo ínaimpá deren dafisinten mino. ²²ⁿTiya rafenu ano minó danáká ma yafisin ákona Yisas Karaisin amikhen mino. Mai monó nanin banta ano mai fintena ayain barano van mi mai ákona amikhen mino. ²³^oMonó nanin banta ma vain mai Yisasin aun ban mino. Máan tukhan mi minó akhempá ma vain danasintafin béi kanai suron ukhen mino.

Tiya rafenu Ano Ma Furin Pintena Yisas Karaisi Má Ma Evaránen Tivían Mantein Baya Ino

2 ¹^pYisas Karaisintá ma fefá ída mumunan ukheya mae Tiya rafenu oo átakharé ureya namu avúavá bariyáke fasen purin nanin banta an mi yakhare ono. ²^qMáan ma iyaona anon afokhampin ma namu aunani ánon banta kayo ano ma Ban Anoni oo yaiyeníi iya va ono. Tiya rafenu oo ma átakharé iyain nanin banta aúpin mai namu aunan manon dafíken doriyan mino. ³^rMáan tiyan mifo Yisas Karaisintá ma fefá ída mumunan ukhé tifé maé teti minó ano yeren mai avúavá bariyaré tiféuno. Tetí

^j 1:17 Kor 1:9 ^k 1:19-20 Kor 1:11; Íbo 110:1; 2Ko 13:4; Kor 2:12 ^l 1:20 Íbo 110:1; 2Ko 13:4; Kor 2:12 ^m 1:21 Kor 1:16; 2:10 ⁿ 1:22 Íbo 8:6 ^o 1:23 Rom 12:5; Efe 4:10, 15; Kor 1:18 ^p 2:1-5 Kor 1:21; 2:13 ^q 2:2 Kor 3:7; Tai 3:3 ^r 2:3 Kor 3:6

ankan dere ume avúavá pinté e afoká ukhá é tifékun Tiýarafenui aran naná ano ma minó ena anan nanin bantafin ma erikhá ein mano setimpin má deren erikharen mino.

⁴Máan tinten mifo mai ma arunaná bíkakhein Tiýarafenu ano setin nan moékantá anunu uren ⁵tetí ankan ma véin oo átakharé eruna anoi furin nanin banta an dakhá é tifékun mi Yisas Karaisin ma avían mantein manon tetin auyen aunan timen mino. Mai Tiýarafenu anon bei sarisarifó tetin tiya uren evaránen tivíken mino. ⁶Tiýarafenu ma furin pintena Yisas Karaisin má orun tivían mantaren maen inarufá ma vain danasintará dafisin nono sen iyátintáken mino. ⁷Yisas Karaisin pintéi uaren Tiýarafenu ano setin tarisari ukhein taréa fi ínaimpa safi mai minó nanin banta anon mai ma minó daná esantakhein danasinta ma aní ukhein onanten mino.

⁸Mai fara vara seyo, Yisasintá ma mumunan eona anarái Tiýarafenu ano vei sarisari fóké tiretin aya uren evaránen avíken mino. Mai sireti ma kama avúavá bariyaona vara máan ten naifo Tiýarafenu ano vei anunurái faran aya uren evaránen avíken mino. ⁹Tiretí ankan ma kama avúavá manteona vara Tiýarafenu ano aya uren evaránen avíken naifo mana ano ída vá be amo sino. ¹⁰Mai fara vara seyo, Tiýarafenu ano Yisas Karaisin pinté uaren mi setin kama uren uvamáda bá tiféuno. Mai vará téti nan ma kama avúavá barano van ma fefá iniádan baré ein ná bará tifano.

Yisas Karaisin Má Ma Mana Vukhafaí In Baya Ino

¹¹Tiretí ankan ída Yutan kayo ompo ena anan bantafin mi afoká ukha ompo afovasá ono. Máan tukhein nan mi Yutan kayo ano siretin nan ída au kakhein kayo ino siren betí ma yan bukhafa máará kakhein nan mi au khákan iyan mifo aúpin ída funtáken mino. ¹²Máan tukhen mifo maí damú tiretí ankan ída Yisasini ádé bare ompo ovare vá me ineno. Isareri nanin banta van ma Tiýarafenu ano vei vanasi e sen avíkeimpin tiretin má maifin ída váke Tiýarafenu ano ma vetin iyáantákeimpin ída siretin nina van mino. Mai fara va ino. Tiretí ankan ma ma varafin báke ompo Tiýarafenu ída afová eya inká beni kama yanasinta van ída ákona e ave ukhare ono. ¹³Máan tukha ompo Yisasi ma siretin nan e furen ma vei nare vanaein manon tiretin e avían beni ádé kaen mino.

¹⁴Mai fara vara seyo Yisas Karaisi anon tetí Yutan kayo vá inká tireti ena anan kéká bá ma ará kusen manafin ban avúavá timen mino. Mai ma erasampin ma ven ará namu uantan maran iyákun ma mai ano erasan aúbaná ma kákan on kakhá ein mi yo máden mai on evaránen antíkaren erasan maman manafiníen mino. ¹⁵Yutan kayoi man bayafin kokhon

^s 2:4-5 Rom 6:11-13 ^t 2:6 Kor 2:12 ^u 2:9 1Ko 1:29-31; 2Ti 1:9 ^v 2:10 Tai 2:14

^w 2:12 Rom 9:4; Kor 1:21 ^x 2:13 Kor 1:20 ^y 2:14 1Ko 12:13 ^z 2:15 Kor 2:14

bayan baré íkan mi Yisasini furin manon mai vaya kayo yo maman karúðaren Yutan kayo vá ena anan kéká bá e avían beyantá túpá uren mi maman mana auyen ananíen mino. Míkanan ma ará kusen manafin ban avúavá ameno van mi véi máan ten mino. ¹⁶ ^aBéi ma yaa unkamádantá purein manon míkanan anan maman manafiní uran mi vékanan Tiýarafenu vá aronáien mino. Mai van mi míkan mano ída evaránen ben ará namu uantan maran inten mino. ¹⁷ ^bYisas Karaisi ano ma ma varafin eriven tireti ena anan kéká ma Tiýarafenui ádé ída váke nentá ma vaona vá inká tetí Yutan kayo ma Tiýarafenu ádé bá tiferuna vá ano ma kusen bani kama vayan tisimen mino. ¹⁸ Mai fara vara seyo, Yisasin pintéi uaré teti Yutan kayo vá tireti ena anan kéká bá ano kasaé Tiýarafenu avorá ódó tifantékun mai ma varé tiferuna Kantá Aunan manon mai aa aní inten mino.

Tiýarafenui Kantá Namuni Vaya Ino

¹⁹ ^cMáan tukhayan tiretí ena anan kayo ano saréa ída soya nanin banta ma vaonaí ukha ompo siretin má deren Tiýarafenui vanasí vákeya veni kékasí ukha ono. ²⁰ ^dMáan tukháí setí ankan Yisasin amái vákun mi inká beni kama vaya ma varen orin banta kayo vá sakhanampa vanta kéká bá anon namádaní ukhan inká Yisas Karaisi anon beyantá mai namuni Bafaní ukhen mino. ²¹ ^eMai setí ankan ma mumunan iyá tiferuna anoi maman manafiní uvéi Bafani kantasí ukhein monó namun ma uvariýá tiféuno. ²² ^fMáan tukhayan tireti ena anan kéká bá ano yere Yisasimpin o asótú uven nan mi siretin ma maman Tiýarafenui Kantá Aunan ma van namuní iya ono.

Pori Ena Anan Kayofin Monó Tiamin Banta Ino

3 ¹ ^gTiretí ena anan nanin banta aya ono van mi séi Pori ano Yisas Karaisini karavusifin bá uno. ² ^hBákun mi siretí ankan ena anan nanin banta ma siamíden tarisari ino van ma Tiýarafenu ano ma simikhein doran inka afová ukha rono. ³ ⁱMai sarisari ma aúpá baréin ma Tiýarafenu ano séin aníí ódaré maé ma fefá afova vompon tiretin uvaman amikharé erunan taréa afoká en mino. ⁴ Máan tukhein mi mai ma uvaman amikharé eruna vompon ma yankafinteyan Yisasi ma yoriyaré éi pákena ma afová ukheruna mai afová inono. ⁵ Pefá Tiýarafenu ano mai aúpá ineine ída vanasifin aníin ontaren mifo saréan Kantá Aunan tákéi sakhanampa vanta kayo vá inká baya ma varen orin banta kéká bápín mi afokáin onen mino.

^a 2:16 Sek 9:10; Kor 1:20, 22 ^b 2:17 Ais 57:19 ^c 2:19 Efe 3:6 ^d 2:20 1Ko 3:11

^e 2:21 1Ko 3:16 ^f 2:22 1Pi 2:5 ^g 3:1 Fir 1:7, 13 ^h 3:2 Kor 1:25 ⁱ 3:3 Efe 1:9-10; Kor 1:26

^{6j}Máan tukhan Tiya rafenui aúpá ineine máan mi ukhen mino. Tireti ena anan nanin banta ano ma mumunan iyaona kéká bá inká Yutan kayo ano ma mumunan ukhein kayo vá ano maman manaí uveyan Yisasin má túpá eonai véin pinté uarei Yutan kayo ma iyáantan baré ein danasinta yaídeya varan nono. ^{7k}Tiya rafenu ano séin tarisari uren kama usintáden ákona simikhái veni yoran bantaí ukhé beni kama vaya ma siamin dorarí iyá uno.

^{8l}Tiya rafenui kama nanin banta an téi ída yakhékun mi Tiya rafenu ano séin tarisari uren mi Yisasin ída kanaíen dosiren kama yanasinta setin timikheí pákena van ma ena anan nanin banta siamin doran téin timikhen mino. ⁹Máan tukhan mi minó daná ma uvantein Tiya rafenu ano séin nan bei aúpá ineine ma esé araí in tá baré ein maman dákó ino van mi séin aní uren tivíken mino. ¹⁰Máan tukhan mi véi ma ena anan má Yutan kayo vá ma maman manafiní inain manon bei kama ineine vá afova vá ma ayompin bákan ma ákona ví bá ma vain aunan kayofin afoká inten mino. ¹¹Pefá ma vara ma ída uvanten maen béi Bafan Yisas Karaisin pinté uaren mai yaná barano van mi iniádákaren baren mino.

^{12m}Tetí ankan ma véintá mumunan é tiferuna anon béimpin o asótú uvé tifékun mi mai anon Tiya rafenu vaípa ma orin ona yirá tiféi véin avorá ída feranton oriya tiféuno. ¹³Máan tukháí séi ma kama vaya siamiyarunará ma uman timiyain nan tiretí ena anan nanin banta ano ída anomé iniyáke amusin mana ono van mi ákona é tiamiyá uno.

Pori Ma Efesasi Kéká Ákona Uantano Van Amúkein Baya Ino

¹⁴Mai anarái séi siron kanan durafúdé tiretin nan te Sifóe vaípa timúkiyá uno. ¹⁵Mai fara vara seyo, ma vara ráke yanasinta vá inká inaruráke yanasintará ma ánoní ukhein benafo veyáká anan ban mino. ¹⁶Máan tukhan béimpin moéken avábá bakái veni Kantá Aunan mano siretin ákona amino van mi séi simúkiyá uno. ¹⁷ⁿInká Yisas Karaisintá ma mumunan esin maen tiretimpin béi vanten mino. Máan tuvinti Tiya rafenui kama varafin ma amun dan aravuvin mantan ákona einí ono van mi simúkiyá uno. ¹⁸Tiretí ankan má minó Tiya rafenui mumunan nanin banta vá ano Yisas Karaisini ída kípan avábá ma kákaní in inká ayasí in dan ódin ma námen aravin ukhein ma afová in ákona varano van mi simúkiyá uno. ¹⁹Yisas Karaisini avábá maen moéken kákan mi vantiya ída kanaíeya minó afová inompo mai finté manáa kokhon afová ono van muno. Máan tesin maen Tiya rafenui aunan má ákona vá ano siretimpin bíkakhen bano van mi simúkiyá uno.

²⁰Tiya rafenui ákona ano ma setimpin doriyá ma setí ankan ina ono van ma iniyá tiferuna yanasintai ákona ano moéken esantakhen mino.

^j 3:6 Efe 2:13, 16-19 ^k 3:7 Kor 1:25 ^l 3:8 1Ko 15:9-10 ^m 3:12 Yon 14:6; Rom 5:2

ⁿ 3:17 Yon 14:23; Kor 1:23; 2:7

21 Máan tukhein nará minó mumunan nanin banta ano Yisas Karaisin táké uaren ná ena ena yamú Tiya rafenun kákan bí amen oriyán ná bano. Pura ino.

Yisas Karaisi Má Ma Mana Vukhafái in Baya Ino

4 ¹°Tiyarafenu anon tiretin arakhen mifo mai van inian kákaní ono van mi Bafani yorarí ma iyarunará ma fákaan karavusií ukhein banta anon tiretin duvun iyá uno. ²°Ena ena yamú kuse váke vá bempákesá nono. Tiretíí avábá posá beni uman ayain maran ná ono. ³°Tiretí ákona ure vá Kantá Aunan má o súpá uveya ará kusen ban avúaváposá tiretiyan damono. ⁴Para vara seyo, mana vukhafa vá mana Aunan máí vákan inká ínaimpáke yanáká ma ákona inin kauren ma avein mai manan bákan mi siretin arakhen mino. ⁵⁻⁶°Mana Bafan má mana mumunan má mana non baran má inká tetin Tifóe mana Tiya rafenu vá anan ban mi minó tetimpin doriyáken minó esantakhen mino.

⁷°Máan tukhen pasen mi Yisas Karaisin pinté uaren minó nanin banta avábá uren mana mana amusin daná amirú amirú ukhen mino. ⁸°Máan tukhein nan mi Tiya rafenui vompon dóki ano máa sikhen mino.

“Béi ma inarufá ódiyáken maen

bei vanasi ma karavusií ukhá ein iyanen ben oyampá oriyán
maen mana yaná amusin amirú en mino. *Íbo 68:18*

⁹°Mai ma véi yan ódé uno ma sein bayai ana máan mi ukhen mino. Ma ma seti varuna varafin béi veyan maman bararasí uren erakharen mi evaránen ódikhen mino. ¹⁰°Mai ma veyan maman bararasí uren erakhá ein mano anan minó danápin béini yafisin mano víkano van ayompin ma vain danasinta esantaren dan uron ódikhen mino. ¹¹°Béi anon monó nanin banta amusin amen mi manáa avían aposeríen inká manáa avían sakhanampa vantaíen inká manáa avían monó nanin bantará dafisiníen mi inká manáa avían monó baya ma siamin bantaíen mi inká manáa avían monó afova ma amin bantaí urú en mi ukhen mino. ¹²°Máan tukhan mi vetíi yoran ma vain mai Tiya rafenui vanasi ayaintin beni yoran doriyáken monó nanin banta ano ma Karaisin au vukhafái ma ukhein mai ákonaen báken kamaen bano van mino. ¹³°Máan té oriyá tifé ma setisi mumunan má afova vá ma o éke e éke uan Tiya rafenu Anintá kauré ma sirá manafiní uré tifé ma Bafan oman tapé tiyá inká monó tin avúavápin ma mantaan ákona uvé maé Yisas Karaisi ma kama avúava sinta ma variyá einí ó tifanté uno.

¹⁴°Máan tuvé maé ída evarané arará iyampon kayo an davé kampun banta kékái vaya van puran tiyan mantino siré e mumunan uan more

° 4:1 Kor 1:10 ° 4:2 Kor 3:12-13 ° 4:3 Kor 3:14-15 ° 4:6 1Ko 12:6 ° 4:7 Rom 12:3, 6
° 4:9 Yon 3:13 ° 4:11 1Ko 12:28 ° 4:13 Kor 1:28

mere ó tifanté uno. Mai fara vara seyo, manáa kéká ano kampun baya fóké dákói fura vaya ma seiní iyáken tetin máka siyan mino. ¹⁵ ^wMáka sinten mifo seti monó nanin banta ano vá tetisi ánon ma Yisas Karaisi váká ma ven au an ma yakhé tiferuna kéká ano vá beni avúavá moéké bariyákesá pura vaya vá avábá basá pákaan ákona ó tifano. ¹⁶ Máan tukhé tifékun mi véi anon minó bukhafa maman manará asótú uran kamaen báken bei yorará urú iyáken mi ena vukhafa aya íkan inoríyan mairái minó bukhafa ano kama ukhen avábápin inoríyan mino.

Kakhan Avúaváká Ma Vain Iyamporinta An Ma Yakhen Ban Baya Ino

¹⁷ ^xMáan tukhein nan mi Bafani ákonará tiretin ma vaya siamiyá uno. Monó ma ída inin nanin bantai avúaváká ída vá nono. Mai fara vara seyo, vetí inin asuse uron mi ukhen mino. ¹⁸ Betí inin maen títipa an mi yakhan pasen Tiya rafenui avúavápin nenta suron mi van mino. Mai fara va ino. Betí inin mano nenta suron bákan aú ano ákona ukhen mino. ¹⁹ Máan tukhan pasen betí ineine finte kama inin orivin maen moéken namu avúavápin oferan namu ineine kayo anan bíkakan pasen kasaen ara ara avúavasí é iyan mino.

²⁰ Máan té iyan mifo siretí ankan mai aa sákesa Yisas Karaisin afová ukhe va ono. Ída ino. ²¹ Yisasin pinten mai fura vaya inirei véin afová eono. ²² ^yPefá tiretí ankan má deren mai ma kampun tin avúavá bá inká ará mantan ma namu avúavá barampin má bare ompo saréa mai avúavasá oyan ameno. Mai fara vara seyo, mai avúavá anon kampun tireya vanasii ineine máde asuse uantiyare ono. ²³ ^zMáan ma iyá eona vará monó avúavápin tiretí ineine vasá maman auyení ono. ²⁴ ^aTiretí ankan auyen nanin bantaí ukha ompo auyen avúava sá aní ono. Mai fara vara seyo, Tiya rafenu ano maman beyan an mi yara vaompo funtákein nanin bantaí ukheya kantasí ukhe fura yaná ana vá barano.

²⁵ ^bMai vará kampun tin avúavá ifa ureya vá pura sikhein baya ana vá ben tiamin maran ono. Mai fara vara seyo, setí mana vukhafa finte nan bá tiféuno. ²⁶ ^cTiretí ankan umeí inampo ída vá áesin arankan avúavá ano siretintá dafisino. *Íbo 4:4*

Ída vá aran nan iya vasin ná áau eraven orun perano. ²⁷ Mai fara vara seyo, aran nan ma in avúavá anon Ban Anoni ona yiantan nono.

²⁸ Umoyan ma iyá inona kéká ano mai avúavá ifá ure vá tiretí ayampó pura se kama yorará ureya kokhon daná máde vá o ma afasí ukhein nanin banta siretí aúkáke sá aya ono. ²⁹ ^dTiretí ankan oorá dafike ída vá namu vaya kayo seno. Ena nanin banta ma aya oren baya kayo ana siyasín ná mai vaya ma inin nain kayo aya ino.

^w 4:15-16 Kor 1:18; 2:19 ^x 4:17 Rom 1:21; 1Pi 1:14 ^y 4:22 Rom 8:13; Kor 3:9

^z 4:23 Rom 12:2 ^a 4:24 Esé 1:26; Kor 3:10 ^b 4:25 Sek 8:16; Kor 3:8-9 ^c 4:26 Yem 1:19-20 ^d 4:29 Kor 4:6

30^eTiyarafenu ano siretin evaránen miyaní uren maen bei Kantá Aunampó tiretin aníen be ina e sikhen mifo ída vá tiretíí avúavá ano Kantá Aunan arunaná amino.

31^fMáan tinona van mi ena asiren ma ará namu uantan avúavá bá aranan in má baé naé tin má oyampá baya sin má inká namu avúava sinta vá ampeno van tiyá uno. 32^gAmpire vá tiretí ankan ben kama uren ará amin maran iyákeya vá Tiyarafenu ano ma Yisas Karaisin pinté uaren ma siretíí ume ampianteiní eya vá enai ume ampiantano.

Kakhakheintá Ma Van Baya Ino

5 1^hTiretí ankan ma minó danasí inte mae mai Tiyarafenui avúavá ánain ná bákurono. Mai fara vara seyo, siretí béin akhafanan ban nan tireti nan anunu ukhen mino. 2ⁱYisas Karaisi ma siretin nan anunu uren ma vei aufó ákonte uran Tiyarafenu avorá aunka uveri an dákan ma amusin uaren tiretíí ume ampianteiní e vá ena ma anunuin avúavá áesin ná tiretimpin bíkakhanti vá bano.

3^jMáan tukhanti ída vá pamúku avúava safi ena ina yaná ma aranan nafi ena namu avúava sinta fi vá barano. Mai fara vara seyo, Tiyarafenui vanasifin máan avúavá ma variyain kayoi afokhan ída van mino. 4^kTiretí ankan Tiyarafenu vá tusu siantan nampo ída vá namu vaya fi aniana vaya fi inká namu vaya fo safi vá taró teno. 5^lPara vara seyo, siretí ankan afovasá ono. Pamúku avúava safi inká ída funtákein avúava sinta fi ena ina yaná ma aran nan nafi ma variyain mai kampun ayarafenu kayoi monó tiantiyain pasen máan nanin banta ano ída kanafen Yisas Karaisin má Tiyarafenu vái yafisimpin orinten mino. 6^mKampun banta kayoi vaya inire vákurin nampo yaffian ná ákona oro. Mai fara vara seyo, namu avúavá ma variyá inain nanin banta amanináí Tiyarafenui aran naná afoká inten mino. 7ⁿMáan tukhanti mai ma vanasi ano ma namu avúavá baran naimpin ída vá o fébe varano.

8^oMai fara vara seyo, fefá títipafin baré en nan mi saréa Bafan mano avían kakhantá kaúken mifo kakhhan avúavá kasá bano. 9^pMai fara vara seyo, mai khakhan ma siretimpin bain manon kama avúavá bá puntákein avúavá bá inká pura sin avúavá báí maman dákó é iyan mino.

10^qMáan tukhein nará Bafan mano ma amusin oren ukhein avúavasá dosireya afová oro. 11^rNamu avúavá ma variyain nanin banta vá ída vá avunté ono. Mai avúava sinta ano ída kama aran imádé iyan mino. Máan tukhein nará mai avúava sinta vará antan nono. 12^sMai fara vara seyo, ume nanin banta ano ma aúpáké bariyain avúavá ma yákó tian amáin

^e 4:30 Ais 63:10; Efe 1:13-14; 1Te 5:19 ^f 4:31 Kor 3:8 ^g 4:32 Mat 6:14; 18:22-35; Kor 3:12-13 ^h 5:1 Mat 5:48 ⁱ 5:2 Eks 29:18; Ibu 10:10 ^j 5:5 1Ko 6:9-10; Kor 3:5 ^k 5:6 Rom 1:18; Kor 2:4, 8 ^l 5:8 Yon 12:36; Efe 2:13; Kor 1:13; 1Pi 2:9

nan tiyave inten mino. ^{13m}Máan tiyan mifo oon mano ma vetimpin panu sin maen namu avúava sinta maman afoká é iyan mino. ¹⁴"Para vara seyo oon mano ma kamaen panu sin maen minó daná maman dákó é iyan mino. Mai van mi máa sikhen mino.

"Aun ma vakheona kéka soe, mantano.

Púkanona finté orun mantesin ná

Yisas Karaisi ano kakhaantano."

Kantá Aunani Ákonará Ma Van Baya Ino

¹⁵°Máan turanti siretí ma vanonafin dafian ná ákona ukhe vano. Kama ineine ma vákan bain nanin banta an ná dakheya ída vá aniana ma ukhein nanin banta an dano. ¹⁶Taréa namu yamúi va ompo yafian ákona ukheya ena ena kama avúavá ana vá barano. ¹⁷Mai van ída vá aniana iya váke Bafan mano intéa yanasá barano van anunu ukhen nafi mai yanasá afová ono. ^{18p}Mai namu avuává ano siretí van máden asuse inten mifo ída vá óen non nare óen iya vano. Áesin ná Kantá Aunan mano vá tiretimpin bíkakhanti vá bano. ^{19q}Banti vá Í Bompon pintena í bá ena í kayo vá inká Kantá Aunan mano ma inimpin báuantan nain í kayo vá ben tiamin maran iya vá tiretí aúkáké Bafantá í dano. ²⁰"Máan tiya mae minó danasinta vará tetisi Bafan Yisas Karaisin avíkasá ena ena yamú tiretin Afóe Tiyarafenun ná tusu siantano.

Ábasu Ano Ma Kamaen Ban Avúavá Baya Ino

²¹sTiretí ankan Karaisin aránaópá báke vá ena nanin banta vá oo yaiyin maran ná ono. ²²tBafani aránaópá ma vaonái eya sireti anasi kayo ano siretí avafuná aránaópasá bano. ^{23u}Mai fara vara seyo, Yisas Karaisi ma monó nanin banta ánon báken ma ve au fóké aya uren ma evaránen avíkeiníen mi vanta anon be anái ánon ban mino. ²⁴Monó nanin banta ano ma Yisas Karaisini aránaópá bainí eya vá tiretí anasi kayo ano vá avafunái aránaópasá bano.

^{25v}Inká avafuná ano vá Yisas Karaisi ma monó nanin banta van ma anunu uren aya ono van ma vei aunan ampikheiníe vá tiretí anáona vará anunu ono. ^{26w}Banasi maman kantasí ono van mi Yisas Karaisi anon non má Tiyarafenui vayafó báí vei vanasi sesé uran mi ven avorá kamaen kantasí ukhen mino. ^{27x}Béi ma máan tein mai ve avorá maman avusese en kama urantin pain nafi sonton nafi ída vantín bei vanasi ano ída aau vantín kantasí ana ukhen bano van mino. ²⁸Máan mana en ná avafuná ano ma vetí au van ma anunu iyainíen ná betí anáona vará anunu ino.

^m 5:13 Yon 3:20-21 ⁿ 5:14 Ais 26:19; Rom 13:11 ^o 5:15-16 Kor 4:5 ^p 5:18 Ruk 21:34

^q 5:19 Kor 3:16 ^r 5:20 Kor 3:17 ^s 5:21 1Pi 5:5 ^t 5:22 Kor 3:18; 1Pi 3:1 ^u 5:23 1Ko

11:3; Efe 1:22 ^v 5:25 Kor 3:19; 1Pi 3:7 ^w 5:26 Tai 3:5 ^x 5:27 2Ko 11:2; Kor 1:22

Mai fara vara seyo, avafu ano ma ve ana san ma anunu inten mai fura sen beyan nan mi anunu iyan mino. ²⁹Yisas Karaisi ma ve au an dakhan ma monó nanin banta van anunu iyainien mana vanta ano ída vei au van oman kaumpan é iyan mifo kama uren mi yafisé iyan mino. ³⁰Máan tukháí setí ankan Yisas Karaisini au vukhafan bá tiféuno.

³¹Tiyarafenui vompon dóki ano máa sikhen mino. “Mai van mi vanta ano ve anóe afóen me ampiren be aná bá o súpá en mana vukhafái é iyan mino.” *Esé 2:24*

³²“Mai vaya anon moéken kákani suron ukhen mifo Yisas Karaisi ma monó nanin banta vá maman mana vukhafái ukheí pákena vayan tiádan ban mino. ³³Máan tukhein nan mi siretin evaráné tiamé uno. Mana mana vanta ano ma eyan nan ma anunu iyaonaí eya vá e aná anunu ono. Inká anasi ano vá be avafuni aránaópá báke ná ben oo yaiyino.

Anóe Afóen Má Iyamporinta Vái Vaya Ino

6 ¹“Iyamporinta oe, Bafan mái súpá ukha ompo anóe afóni oo vá daiyono. Mai fara vara seyo, máan ma inteya mai kamaen puntákein avúavá baran nono. ²Tiyarafenui siyan mikan man baya kayo finte ma esé iyáantan ma vain man baya ano máan mi sikhen mino. “Tiretí anóe afóeni aránaópasá bákeya vetin oo vá daiyono.” ³Mai ma iyáantan baya ano máan mi sikhen mino. “Tiretí anóe afóen aránaópá báke ma vetin oo yaiyinte mai kama e ma varará ayáká ban nono.” *Diu 5:16*

⁴Inká tiretí afóe yan noe, ída vá iyampon kayo ma aran amin avúavá bariyákeya vetin kama uantádeya vá Bafani kama avúava sinta vá afova ameno.

Miyan Ída Van Doran Banta Kayo Vá Ayafa Kéká Báí Vaya Ino

⁵“Miyan ída van doran nanin banta oe, Yisas Karaisini oo yaiyono van ma iyaonaí eyá tiretí ayafa aránaópá bákeya vetin ma sin nain dorarisá ono. ⁶Tiretí ayafa kayo ano ma siretin ádé ban nain damú ana ída vá betin amusin ameno van ákona yorará ono. Ída ino. Yisas Karaisini miyan ída van doran nanin banta ma vanteya aúkáke sá Tiyarafenui anunu vákurono. ⁷Bafan mano amusin ino van muno sire vá amusin iyákeya aúkáke sá minó doran dorano. ⁸“Máan tukhein nan mi miyan ída van doran nanin banta fu inká miyan ban doran banta fu mai ovaresá me iné tifano. Tetí ma kama yorará ukhá onunarái siyan Bafan mano miyan timirú inten mino.

⁹Inká tireti ayafa vanta kayo oe, siretí miyan ída van doran nanin banta kayo ída vá akhokho amiyákeya vetin kama uresin ná bano. Ovare

^y 5:31 Mat 19:5 ^z 5:32 Rev 19:7 ^a 6:1 Kor 3:20 ^b 6:4 Íbo 78:4; Pro 22:6; Kor 3:21

^c 6:5 Kor 3:22-23; Tai 2:9-10; 1Pi 2:18 ^d 6:8 2Ko 5:10; Kor 3:24-25 ^e 6:9 Rom 2:11; Kor 4:1

vá me ineno. Betí má tiretí mái Kákan mai inarufái váken béi ída mana van mana anunu é iyan mino.

Tiyarafenui Aruvín Danasinta Fákena Vaya Ino

¹⁰Tesi kípan baya ino. Bafani kákan ákona vasá mantaan ákona ono. ¹¹^fTiyarafenui minó aruvín buí daná ma ureyan kasae mantaan ákona uve mae Ban Anoni máka simpín esantan nono. ¹²^gMai fara vara seyo, varará nanín banta vá ída siruviyá tifé umpo namu aunani ánon banta kayo vá ma varará ma yafíkein namu aunan kayo vá inká títípa avúavá bá ayompín ma namu avúavá bariyain aunan kayo vái siruviyá tiféuno.

¹³Máan tukhein nan Tiyarafenui minó aruvín buí daná urákareya namu yamú ma erintiya kasae mantakhare vá inká aruvín ma kípvinti yere mantaan ákona ukhe vano. ¹⁴^hMantaan ma ákona ono ma sinteya fura vaya ana ma simpó sá amú ananí eya vá Tiyarafenui funtákein avúavápó kápa ona ma uan ákorá iyareínisá ono. ¹⁵ⁱInká Tiyarafenui kama vaya finté ma eriyain kusín baya fosá arantan anamun an dareya fura se útare vá bano. ¹⁶Mai aruvín danasinta ma variyákeya inká mumunan ná pákaan ákona uresín ná mai ano sanko an davintín ná Ban Anoni ira khiyain uve kayo ano e khútino. ¹⁷^jMáan tiyantiya vá inká Tiyarafenu ma siretín evaránen avíkein inín mano vá kápa kamamó ma einí uvintiya vá inká Tiyarafenui vaya fosá maman Kantá Aunani vaenatíí ure vá pákaan ákona ono. ¹⁸^kKantá Aunani ákona rasá ena ena yamú amúkiyáke vá ákona e Tiyarafenu tiamesín ná tiretín aya ino. Ena ena yamusá minó akhempá ma vain monó nanín banta van iniya vá amúkuantano.

¹⁹^lMáan tiyákeya Tiyarafenui kama vaya ma vain mai ena anan nanín banta ina vá dere ifo vá amúkusintiya sirá bení aúpá ineine ída feran kamaesá tian amá uan ameno. ²⁰^mMai fara vara seyo, séi Tiyarafenui oo vantán bákéi mai vaya ma siyaruna anarái siyan tirantantá seni anan kukhen mifo amúkusintiya sirá ída feranton kasaé bení vaya sian amá ono.

Pori Ma Kípiyan Amusin Baya Sein Mino.

²¹ⁿTikikasi maen téin tinunu ukhein tifá tiváen báken tiyaen Bafani ákona yorará iyain bantín téi ma variyaruna fáké baya sian amá intiya inín nono. ²²Mai van mi siretín ákona uantan baya siamiyáken inká teti ma varuna fáke yere siamino van mi véin tiantékun tireti vaonafá orinten mino.

^f 6:11 Rom 13:12; 2Ko 10:4 ^g 6:12 1Pi 5:8-9 ^h 6:14 Ais 11:5; 59:17; 1Te 5:8 ⁱ 6:15 Rom

10:15 ^j 6:17 Ibu 4:12 ^k 6:18 Ruk 18:1; Kor 4:2; 1Te 5:17 ^l 6:19 Kor 4:3-4; 2Te 3:1

^m 6:20 2Ko 5:20; Frm 9 ⁿ 6:21 Apo 20:4; Kor 4:7-8; 2Ti 4:12

²³Mumunan tiyofi sifá tiváeyan noe, seti Sifóe Tiyaarafenu vá Bafan Yisas Karaisin má anon tiretin nan anunu uren ará kusiantáden mumunan ákona uantanten mino. ²⁴Mai ma setisi Bafan Yisas Karaisin nan ma aúkáké anunu iyain kayofin ná Tiyaarafenui sarisari ano vano.